

# ՀԻՇՈՂՈՒԹՅԱՆ ՀԱՅԵՑԱԿԱՐԳԸ ՋՈՒԼԻԱՆ ԲԱՐՆՍԻ «ՎԵՐՋԻ ԿԱՆԽԱԶԳԱՑՈՒՄԸ» ՎԵՊՈՒՄ

ԱՐԵՎՀԱՏ ԽԱԶԱՏՐՅԱՆ

հայցորդ  
Երևանի Վ. Բրյուսովի անվան  
պետական համալսարան  
arev.khachatryan.89@mail.ru

ՀՏԴ՝ 821; 82-3; 82-31

DOI: 10.54503/1829-4278.2025.1-207

## Անփոփագիր

Հոդվածում ուսումնասիրվում է հիշողության հայեցակարգը Ջուլիան Բարնսի «Վերջի կանխագգացումը» վեպում, որտեղ քրոնոտոպը վեպի հիմնական գաղափարը միավորող ստեղծագործական գործիք է: Ժամանակի և տարածության յուրահատուկ խաչմերուկում ձևավորվում են քրոնոտոպային միավորներ, որոնք թույլ են տալիս ստեղծելու եզակի գեղարվեստական իրականություն: Քրոնոտոպը ներկայացվում է որպես «փոխակերպում», որը վերափոխում է երևակայականն ու իրականը: Հեղինակը խառնում է իրականությունն ու հիշողությունը, բարդացնում իրադարձությունների բովանդակությունը և ստեղծում մի նոր աշխարհ, որտեղ անցյալը և ներկան միավորվում են և ստեղծում բազմաշերտ իրականություն:

Հոդվածի նպատակն է ուսումնասիրել, թե ինչպես է հեղինակը որպես գեղարվեստական իրականություն օգտագործում ժամանակն ու տարածությունը: Նշված նպատակին հասնելու համար կարևոր են հետևյալ խնդիրները.

- դիտարկել քրոնոտոպը որպես «փոխակերպման» գործիք, որի միջոցով իրականը վերափոխվում է երևակայականի,
- վերհանել քրոնոտոպային բարդ զուգորդումների կիրառումը որպես իրականություն, որտեղ հիշողությունը, անցյալը և ներկան միախառնվում են:

**Բանալի բառեր.** Բարնս, պոստմոդեռնիզմ, ժամանակ, տարածություն, քրոնոտոպ, երևակայական, իրական, հիշողություն, կրկնություն, փոխակերպում

## Մուտք

«Վերջի կանխազգացումը»<sup>1</sup> (անգլ.՝ The Sense of an Ending<sup>2</sup>) վեպը Ջուլիան Բարնսի (Julian Barnes 1946) տասնմեկերորդ վեպն է։ Այն լույս է տեսել 2011 թ. և արժանացել է Բուքերյան մրցանակի։ Վեպում գերիշխող թեման ժամանակն է, որտեղ հետաքրքիր է հեղինակի այն նկատառումը, որ անձի երևակայությունը և հիշողությունը անցյալի վերաբերյալ ժամանակի ընթացքում փոփոխվում են, և անցյալը դառնում է անորոշ և անհասկանալի։ Հիշողություններն անընդհատ տատանվում են և չեն հետևում գծային ժամանակացույցին. դրանք շարժվում են անցյալի երևակայական և ներկայի իրական պատկերների միջև։ Հեղինակը փորձում է հնարավորինս պահպանել պատմության և պատումի ժամանակները՝ որպես իրականություն ներկայացնելով հորինված անցյալը։ Ինչպես նկատել է ֆրանսիացի կինոտեսաբան Կրիստիան Մետզը, *«երկերում ժամանակն ունի երկակի դրսևորում՝ պատմության ժամանակ և պատումի ժամանակ։ Եվ պատումի հիմնական գործառույթներից մեկն էլ մի ժամանակի փոխարկումն է մյուսին»<sup>3</sup>։ Պատմության ժամանակը կարող է լինել գծային, իսկ պատումի ժամանակը՝ «շեղուն» է գծային ժամանակը՝ դանդաղեցնելով, արագացնելով կամ կրկնելով հենց ժամանակը։ Սա հնարավորություն է տալիս իրականությունը բազմաշերտ ներկայացնելու, որտեղ մի ժամանակը փոխարկում է մյուսին»<sup>4</sup>։ Այդպիսի երկակիությունը բնորոշ է նաև գեղարվեստական արձակին։ Այդ երկակիությունը ցայտուն կերպով դրսևորվում է Ջուլիան Բարնսի «Վերջի կանխազգացումը» վեպում, որտեղ հեղինակը, փորձում է հնարավորինս պահպանել պատմության և պատումի ժամանակների նույնականացման պատրանքը։ Հիշողությունները կարող են ստեղծվել և իրական չլինել։ Հիշողությունը ենթակա է **մարդու անհատական մեկնաբանություններին և սուբյեկտիվ տպավորություններին**, որոնք հաճախ անորոշ են և վերածվում են պատումների կամ միտումների։ Բայց, միևնույն ժամանակ, դրանք իրականության և պատմության արդյունք են։ Գլխավոր հերոս Թոնիի միջոցով Ջուլիան Բարնսը բացահայտում է խոր արմատացած հոգեկան ապրումներ, որոնք ընկած են հիշողությունների հիմքում։ Ջուլիան Բարնսի «Վերջի կանխազգացումը» ստեղծագործության մեջ տարածք կարող են լինել հերոսի հիշողությունները։ Թոնին իր հիշողություններում ունի ժամանակային տարբեր շերտեր, որոնք դժվար տարանջատելի են։ Ըստ Բախտինի՝ քրոնոտոպը չի կարող լինել մեկը. ավելի մեծ և կարևոր քրոնոտոպերը կարող են ներառել ավելի փոքր քրոնոտոպեր, «յուրա-*

<sup>1</sup> Barnes J., The Sense of an Ending, London: "Jonathan Cape", 2011.

<sup>2</sup> Մեջբերումների թարգմանությունը՝ հոդվածի հեղինակի։

<sup>3</sup> Хализев В. Е., Теория литературы, Москва: «Высшая школа», 2005, с. 240.

<sup>4</sup> Նույն տեղում։

քանցյուր մոտիվ կարող է ունենալ իր քրոնոտոպը»<sup>5</sup>։ Բարնսը սկսում է վեպը՝ խորհելով ժամանակի այս տեսակի ձկունության մասին։ «Մենք բոլորս գոյություն ունենք ժամանակի մեջ. այն և՛ ձևավորում, և՛ չափորոշում է մեզ ... : Խոսքն այն մասին չէ, որ, ըստ որոշ տեսությունների, ժամանակը ինչ-որ կերպ թեքվում և կամ զուգահեռ ընթացքով հոսում ինչ-որ այլ տեղ։ Ո՛չ, ես նկատի ունեմ ամենասովորական, առօրյա ժամանակը, որը կանոնավոր կերպով առաջ է շարժվում ... : Բայց ամենափոքր ուրախ կամ տխուր լուրն այն է, որ ժամանակը ձկուն է։ Այն դանդաղում է որոշ զգացմունքների ազդեցության տակ, արագանում է ուրիշների ձնշման տակ, երբեմն թվում է, թե ինչ-որ տեղ անհետանում է, ... և, երբեք չի վերադառնում» (էջ 16)։

Հերոսի հիշողությունները (Վերոնիկայի, տիկին Սառայի, Ադրիանի մասին) վեպում առանձին քրոնոտոպ են՝ մեծ քրոնոտոպը տրոհելով ավելի փոքրերի։ Վեպում տարածությունը դառնում է ոչ միայն ֆոն, որտեղ զարգանում են իրադարձությունները, այլև հնարներ, որոնք մարմնավորում են հեղինակի պոստմոդեռնիստական գաղափարները։ Նա հիշողությունների միջոցով ընթերցողին տալիս է հնարավորինս մոլորեցնող նկարագրություններ և, ինչպես յուրաքանչյուր պոստմոդեռնիստ գրող, գնահատականը թողնում ընթերցողին։ Բարնսը պոստմոդեռնիստական հնարներով ընթերցողին ստիպում է խորանալ հիշողության և ժամանակի անհասկանալի առաջընթացի մեջ։ «Ժամանակը ընթացքում փոխել է իր էությունն ու նշանակությունը» (էջ 74)։ Հեղինակը վեպի ժամանակային ընթացքը պատկերում է որպես խճանկար. հիմնական պյուժեն կառուցված է տարբեր ժամանակների կցումով։ Այս համատեքստում հատկապես կարևոր է ժամանակի փոխտեղափոխական ընկալումը, որի ակունքներում է Լայբնիցը, ըստ որի՝ ժամանակը կապված է շարժման հետ, այսինքն՝ փոփոխության, ուստի՝ այն չի կարող լինել բացարձակ։ Ժամանակը դատարկ է, բայց և գոյություն ունի միայն այն դեպքում, երբ կա շարժում, փոփոխություն և ընթացք<sup>6</sup>։ Վեպում անցյալը և ներկան շարժվող գծերով զուգահեռվում, հատվում, միանում են։ Ժամանակները խաչվում են և՛ հեղինակային պատումում, և՛ հիշողության, և՛ կերպարների ներսում։

Ստեղծագործության մեջ յուրօրինակ խորհրդանիշ դարձած արտահայտությունները ևս հատում են վեպի ժամանակի ընթացքը։ Հեղինակը վեպի ժամանակային ընթացքը պատկերում է խճանկարի ձևով՝ հիմնական պյուժեն կառուցելով տարբեր ժամանակների կցումով։ Ան-

<sup>5</sup> Бахтин М., *Формы времени и хронотоп в романе. Очерки по исторической поэтике, Вопросы литературы и эстетики*, Москва: «Художественная литература», 1975, с. 235.

<sup>6</sup> Лейбниц и его трактовка времени // [http://www.chronos.msu.ru/old/biographies/kazaryan\\_leibniz.html](http://www.chronos.msu.ru/old/biographies/kazaryan_leibniz.html) (մուտք՝ 07.07.2024)

ցյալը և ներկան շարժվող գծերով զուգահեռվում, հատվում, միանում են: «*Դա այն պահերից էր, որն իմաստ է գրնում ավելի ուշ՝ փաստերից հետո, երբ անցյալի յուրաքանչյուր կտոր սահում է իր տեղը*» (էջ 95): Այստեղ Բարնսը ցույց է տալիս, թե ինչպես է անցյալը վերականգնվում հիշողության միջոցով, ինչպես մի զլուխկոտրուկ, որը երբեք չի տեղավորվում, և ինչպես է պատմությունը ենթակա վերաիմաստավորման: Կտորների «սահումը» ենթադրում է անցյալի իրադարձությունների շարունակական վերադասավորում, որոնք միշտ չէ, որ ձգգրիտ համընկնում են միմյանց: Օրինակ՝ վեպում պատահական չէ, որ անընդիատ հանդիպում ենք *The Rolling Stones*-ի երգը, որը ժամանակի ընթացքի վերաբերյալ է: «*Time Is on My Side*»-ը ծառայում է որպես հիշողության, կարոտի և ժամանակի ընթացքի թեմա: Երգը արտացոլում է Թոնի Վերսթերի մտորումները, նրա անցյալը և պատրանքները, հաճախ հակադրվելով իրականությանը՝ ստիպելով առերեսվել իր հիշողությունների և գործողությունների հետևանքներին:

«*Հերազայում ես ռադիոյով լսեցի Rolling Stones-ի «Time Is on My Side»-ը և մրաժեցի. այո, հենց այդպես է: Ժամանակն իմ կողմից է, այն միշտ էլ եղել է իմ կողմից*» (էջ 150):

Բարնսը այստեղ ընդգծում է այն գաղափարը, որ ժամանակը կարող է լինել և՛ ընկեր, և՛ հակառակորդ՝ հիշողությունները ներկայացնելով որպես փորձառություններ: Ողջ վեպի ընթացքում հերոսը շարունակ հիշում է իր ընկերուհու՝ Վերոնիկայի խոսքերը.

«*Դու այդպես էլ այսքան ժամանակ ոչինչ չհասկացար, չէ՞*» (էջ 110, 130, 150):

«*Այո, ժամանակը իմ կողմից է*» (էջ 91):

«*Այժմ ժամանակը ինձ համար արագ է թռչում*» (էջ 108):

Պատահական թվացող այս կրկնությունները կապում են հերոսի միտքը և հիշողությունը: Նույնը վերաբերում է նաև ժամանակային քրոնոտոպին. հիշողության մեջ ժամանակը կանգնած է և միևնույն ժամանակ գոյություն չունի: Հերոսը մտածում է ժամանակի և զգացմունքների մասին, որոնք անհասկանալի են եղել, իսկ հիշողությունը աղավաղված է: «*Ամբողջ կյանքս ժամանակի և հիշողության մեջ է, երբեմն դժվար է ապագայից նայել հետ, դեպի անցյալ և տեսնել, թե ինչ նոր զգացողություններ է բերել քեզ ժամանակը*» (էջ 130):

Ինչպես արդեն նշվեց, վեպի հիմնական քրոնոտոպը Թոնիի հիշողությունն է, որի շնորհիվ ընթերցողը ականատես է լինում այլոժեի զարգացմանը, իսկ ժամանակը հիշողության մեջ ամրանում է և դառնում գեղարվեստորեն տեսանելի:

Նախկին ընկերուհիի Վերոնիկայի մոր մահից հետո Թոնին մի նամակ է ստանում, որը ստիպում է նրան վերհիշել անցյալում կատարած սխալները, վերագնահատել հիշողության իր տեսակետը, վերանայել

և վերաշարադրել պատանեկան տարիների իրական պատմությունը: Այստեղ Թոնի Վերսթերը բախվում է այնպիսի խնդիրների, ինչպիսիք են հիշողության անկատարությունը, անցյալի և ներկայի բարդ հարաբերությունները, որոնք փոփոխում են ժամանակային և թեմատիկ կառուցվածքը: *«Բայց նրա մահը ավելի շար շոուի համար էր, քան «ողբերգական» ... Աղբիանն արագ անհետացավ անցյալում՝ զբաղեցնելով ժամանակի և պատմության իր տեղը»* (էջ 106):

Ուսումնասիրելով պատմության ժամանակի և պատումի կապը՝ Բարնսի «Վերջի կանխագագու՞մը» վեպում կարելի է դիտարկել հեղինակի կողմից դիտավորյալ ժամանակային հաջորդականության տարաբնույթ խախտումները: Ֆրանսիացի տեսաբան Ժ. Ժանետը այդ տիպի խախտումները անվանել է պատումային անալեպսիս (հետընդգրկում կամ հետհիշատակում), որը ենթադրում է ավելի վաղ կատարված իրադարձությունների ներմուծում: Անալեպսիսն իր հերթին կարող է լինել փակ (պատումի մեջ ամփոփ կերպով ընդգրկվում է ավելի վաղ կատարված որևէ իրադարձություն) և բաց, երբ այն ընդգրկում է գրեթե ողջ տեքստը, և հետընթացը տեղի է ունենում պարբերաբար<sup>7</sup>: Փակ անալեպսիսի օրինակ են այն բոլոր դեպքերը, երբ պատմողը, մի պահ թողնելով բուն իրողությունները, ներկայացնում է իր հերոսի կյանքի ավելի վաղ տարիները՝ մանկությունը, պատանեկությունը կամ որևէ ամբողջական շրջան: Բարնսը վեպում օգտագործում է անալեպսիսը՝ որպես մի տեխնիկա, որը թույլ է տալիս հերոսին վերապրելու անցյալը, որպեսզի ընթերցողին ներկայացնի իր ապրումները: *«Դպրոցական տարիներս առանձնապես չեն հետաքրքրում ինձ, ես նուրազվեցա չունենալ: Այնուամենայնիվ, ամեն ինչ սկսվեց դպրոցից ...»* (էջ 16): *«Մի առավոտ, տնօրենը մահացու ձայնով հայտարարեց, որ ... Ռոբսոն անունով մի երիտասարդ մաթեմատիկոսը է մահացել՝ ինքնասպան եղել»* (էջ 33): Այսպես, Ջ. Բարնսի «Վերջի կանխագագու՞մը» վեպում, ընդհատելով բուն դեպքերը, սկսում է բավական մանրամասն պատմել գլխավոր հերոսի՝ պատանեկության տարիները, նրա ապրած կյանքը մինչև համալսարան, կամ սիրավեպը Վերոնիկայի հետ: Երբեմն անալեպսիսը պատումի հիմնական մասն է, բայց հեղինակը անհրաժեշտ է համարում տարիներ առաջվա դեպքերը շարադրել՝ խախտելով ժամանակային բնական հերթականությունը, կամ երբեմն նորից հետ է գնում ու հիշատակում անցյալի որոշ դրվագներ<sup>8</sup>:

*«Եվս մեկ բան, որ հիշում եմ, երեքս էլ, ի նշան մեր միասնության, ժամացույցը կապում էինք դաստակի ներսից: ... Այսպես մենք ժամանակը դարձնում էինք անձնական և նույնիսկ գաղտնի սեփականություն: Մենք*

<sup>7</sup> **Женетт Ж.**, *Работы по поэтике. Фигуры*, в 2-х т., т. 1, Москва: Изд. им. Сабашниковых, 1998, с. 71-116.

<sup>8</sup> Նույն տեղում, էջ 82:

կարծում էինք, որ Աղրիանը կնկարի այս հնարքը և կհետևի մեր օրինակին, բայց ոչինչ չստացվեց» (էջ 20): Հիշողության մեջ կուտակված մտապատկերներից նոր երևակայական մտապատկերներ և զուգորդություններ ստեղծելով՝ Թոնին նշանակալից խնդիրների լուծումներ որոնելու առջև է կանգնում: Վեպում տարբեր ժամանակային բովանդակության և կառույցի տեքստեր ներդնելով՝ Բարնսը պատկերում է հիշողությունը որպես անցյալի բարձրագույն ձև. «Աղրիանը նամակում թույլտվություն էր խնդրում Վերոնիկայի հետ հանդիպելու համար: Այո՛, այո՛, բայց ինչո՞ւ նրա հետ, ինչո՞ւ հենց այդ պահին, իսկ ընդհանրապես ինչի՞ պետք է թույլտվություն խնդրել: Իրականում, եթե ես հնարավորինս հավատարիմ մնամ իմ հիշողությանը, ապա նա բառացիորեն գրել էր հետևյալը. նա և Վերոնիկան արդեն հանդիպում են, և վաղ թե ուշ յուրը կհասնի ինձ, և, հետևաբար, ավելի լավ է՝ ես դա իմանամ իրենից: ... Եվ, վերջապես, Վերոնիկան նույնպես համաձայնեց, որ նման նամակ գրելը պարզապես անհրաժեշտություն է, ավելին՝ դա մասամբ նրա գաղափարն էր» (էջ 83):

Հերոսի մտածողությունը, պատկերացումները և հույզերը հասկանալու համար այս տեքստերը քրոնոտոպային մի յուրօրինակ ուղեցույց են: Անցյալի անորոշ հիշողությունների միջոցով Բարնսն իր ընթերցողներին ստիպում է չհավատալ հիշողություններին, քանի որ հիշողություններն անընդհատ փոխվում են և չեն հետևում գծային ժամանակացույցի: Դրանք շարժվում են անցյալի երևակայական և ներկայի իրական պատկերների միջև՝ խախտելով քրոնոտոպը: Վեպում պոստմոդեռնիստական մասնատման հնարքը ծառայում է որպես հիշողության իրական կամ երևակայական ներկայացում: Հեղինակը ընթերցողին ստիպում է անցնել հերոսի երևակայական հիշողությունների միջով և շեղում իրական գրական գործընթացից, որը կարճ ժամանակում առաջացնում է մի շարք կեղծիքներ և փոխարինումներ: Բարնսը ստեղծում է «Երևակայության պատկեր», որը նպաստում է երկի ժամանակային ողջ շերտերի նորացմանը: «Կարծում էի, որ լավ հիշողություն ունեմ: Բայց պարզվում է՝ ո՛չ: Ես հիշում եմ այն, ինչ ուզում եմ հիշել, բայց ոչ այն, ինչ պետք է»: «Ես սրիպված էի ինքս ինձ հիշեցնել, որ հիշողություններն անվարահեղի են: Հիշողությունների դժվարությունն այն է, որ չես կարող ընտրել: Դրանք նման են ոլորահալ սղոցների կտորների, որոնք երբեմն չեն համընկնում միմյանց» (էջ 221-222):

Ֆրանսիացի գրականագետ Ժիլ Դելյոզը ժամանակակից քրոնոտոպը սահմանում է որպես «աբստրակցիա, երկարավածություն, երկակիություն և կրկնություն: Դելյոզը դիտարկում է ժամանակը որպես խորհրդանշների համակարգ, որտեղ հերոսի հիշողությունը դառնում է սրեղծագործության գլխավոր գաղափարը»<sup>9</sup>: Վեպի գլխավոր քրոնո-

<sup>9</sup> Deleuze G., The logic of sense, London: Columbia University Press, 1990, p. 57-62.

տոպը՝ հիշողությունը, «փոխակերպում» է հերոսին, քանի որ նա չի հիշում, թե կյանքի ինչ-որ փուլում ինչպես է ընդունել ընկերոջ՝ Ադրիանի գրած նամակը: Նա իմաստը սինթեզել է երևակայականի միջոցով:

Թոնիի հիշողությունների այս սխալ բնույթը երևում է, երբ Վերոնիկան Թոնիին տալիս է նամակ, որը նա գրել է Ադրիանին իր երիտասարդության տարիներին. «*Ես մի քանի անգամ վերընթերցեցի այս նամակը*»: Հետագայում նա հասկանում է, թե որքան տհաճ նամակ էր գրել՝ լի հայիոյանքներով. «*Սիրելի՛ Ադրիան, ավելի ձիշտ՝ սիրելի՛ Ադրիան և (տականք) Վերոնիկա, հուսով եմ՝ դուք կգոջաք, որ ես ձեզ ծանոթացրել եմ*» (էջ 95): Երբ նա վերընթերցում է այս տողերը, նա հուսահատորեն զոչում է իր արածի համար, ինչպես պարզ է նրա խոսքում. «*Պարկերացրեք խայթոցի ուժը, երբ ես վերընթերցեցի իմ խոսքերը. նրանք կարծես ինչ-որ հնագույն անեծք լինեին, որոնց մասին ես նույնիսկ մոռացել էի*» (էջ 138): Այս նամակը տրոհված մյուս քրոնոտոպն է և վեպի կարևոր խորհրդանիշներից մեկը՝ հղում կատարելով նրա կորցրած հիշողություններին: Ընթերցողը երբեք չի կարող որևէ բան կարդալ կամ հասկանալ մինչև այն չբացահայտի Վերոնիկան: Գլխավոր հերոսի համար ժամանակի ընկալումը հիմնականում անձնական է, և որևէ կապ չունի սովորական ֆիզիկական ժամանակ ասվածի հետ: Այս գաղափարը կարելի է համեմատել Հենրի Բերգսոնի «Ժամանակ և ազատ կամք» աշխատության հետ:

«*Հիշողություններն ունեն իրենց ժամանակային շրջանակը՝ լիովին անկախ ֆիզիկական ժամանակից: Ժամանակը մարդու մարմնում ձկուն է: Եթե ժամանակի ձանապարհորդությունը հնարավոր է, ապա հիշողությունները միակ ժամանակի մեքենաներն են, որոնք հասանելի են մարդկային գեղին*»<sup>10</sup>:

Անցյալը երկիմաստ է՝ մե՛րթ իրական, մե՛րթ երևակայական: Թոնին փորձում է իրականությունից փախչելով երևակայել և ժամանակը վերադարձնել, վերաշարադրել և ուղղել իր սխալները: Հիշողությունը վճռորոշ դեր է խաղում Թոնիի համար, իր անձնական պատմությունը ներկայացնելով այնպես, ինչպես ինքն է ցանկանում: Բարնսը, ավելացնելով որոշ երևակայական իրադարձություններ, պատմվածքը դարձնում է երկիմաստ և անվստահելի: Նա ընթերցողին հնարավորություն է տալիս գուշակելու հիշողության մեջ պատմությունների իրական լինելը, ապա կասկածի տակ է դնում հիշողությունը և հասկացնում, որ իրականությունը այդքան էլ իրական չէ, իսկ ձշմարտությունն էլ մեկը չէ: Իրականությունը լի է անհասկանալի հիշողության կտորներով և պատմության սուրբեկտիվ մեկնաբանություններով: Սա հստակորեն

<sup>10</sup> Bergson H., *Time and Free Will. An Essay on the Immediate Data of Consciousness*, London: George Allen & Unwin LTD, 2018, p. 98–134 (E-Book #56852, accessed 06.04.2024).

շեշտում է Բարնսը, երբ Թոնին ստածում է կյանքի և հիշողության մասին՝ ընդդեմ իրականության:

*«Որքա՞ն հաճախ ենք մենք պատմում մեր կյանքի պատմությունը, որքա՞ն հաճախ ենք մենք հարմարեցնում, զարդարում, խորամանկ քայլեր անում: ... մեր շրջապատում կլինեն մարդիկ, որոնք ... կհիշեցնեն մեզ, որ մեր կյանքը մեր կյանքը չէ, այլ պարզապես պատմություն է, որը մենք ունենք: Պատմություն մեր կյանքի մասին» (էջ 95):* Իր հարցազրույցներից մեկում Ջեֆրի Բրաունի հետ այն հարցին, թե արդյո՞ք պատմողը ուզում է հասկացնել ընթերցողին, որ հիշողությունը ոչ այլ ինչ է, քան պատմության սեփական մեկնաբանություն, Բարնսը նշում է. *«Գիտե՞ք, մենք սկսում ենք պատմել մեր պատմությունները, իսկ հետո, երբ մեծանում ենք, մեր կյանքի վկաները պակասում են, և այդպիսով, ավելի քիչ մարդիկ կան, ովքեր իրականում կարող են ստուգել կամ վիճել իրադարձությունների մեր վարկածի հետ: Այսպիսով, եթե ինչ-որ բան առաջանա, որը ձեր քիթը կանգնեցնում է կեղծիքի պատին, դա զրքի էներգիան և գործողությունն են առաջացնում: ... Հետաքրքիրն այն է, թե ինչպես ենք մենք ընկալում աշխարհը, և ինչպիսին է աշխարհը իրականում: Տարբերությունները պատմությունների միջև է, նրանք, որոնք մենք պատմում ենք ուրիշներին, և այն պատմությունները, որոնք մենք ինքներս ենք հիշում»<sup>11</sup>:*

Ջուլիան Բարնսի «Վերջի կանախագագունը» վեպը խճճված կերպով միաձուլում է ժամանակի, ճշմարտության, պատմության և հիշողության թեմաները՝ կոչ անելով ընթերցողներին խորհել անձնական բնույթի և հիշողության հավաստիության մասին: Իրականության և երևակայության միախառնումը թույլ է տալիս հեղինակին խորամուխ լինել Թոնիի ափսոսանքների և բաց թողնված հնարավորությունների մեջ: Երբ Թոնին վերանայում է իր անցյալը, նա պատկերացնում է տարբեր արդյունքներ և հնարավորություններ՝ ընդգծելով մարդկային հույզերի բարդությունը և ընտրությունների ազդեցությունը ժամանակի ընթացքում: Վեպի կառուցվածքն ինքնին խառնում է ժամանակի, իրականի և երևակայականի սահմանը: Բարնսն օգտագործում է այս խառնուրդը շերտավոր պատմվածք ստեղծելու համար: Ամբողջ վեպի ընթացքում Թոնին ստածում է, թե ինչպես է ժամանակը փոխում իր հիշողությունները: *«... Մեր հիշողության մեջ մարքերը հենց այնպես գոյություն չունեն, նրանք ժամանակի մեջ են: Մենք առաջ ենք մղվում՝ նկարագրելով նույն իրադարձությունները, վերադառնում նույն մարքերին և զգացմունքներին: ... Ավելի ուշ ես սկսեցի հիշել այնպիսի բաներ, որոնք վաղուց արդեն մոռացել էի» (էջ 220–221):*

<sup>11</sup> Interview with Barnes <https://www.pbs.org/newshour/arts/conversation-julian-barnes-winner-of-the-2011-man-booker-prize> (accessed 06.27.2024)



Թոնիի ստորումները ցույց են տալիս, թե ինչպես հիշողությունը կարող է լինել և՛ մխիթարության, և՛ անհանգստության պատճառ: Նա հաճախ է բախվում այն փաստին, որ իր հիշողությունները չեն համընկնում ուրիշների հիշողություններին: Այս անհամապատասխանությունն ընդգծում է վեպի հիմնական փաստարկը. մեր անձնական պատմությունները կառուցված են պատմություններից, որոնք կարող են կտրուկ տարբերվել մեկը մյուսից: *Երիտասարդները հորինում են պատմություններ ապագայի մասին, իսկ տարեցները անցյալը հորինում են ուրիշների համար (էջ 151):* Իզուր չէ, որ վեպը սկսում է պատմել թոշակառու տարեց մարդը, որի հիշողությունները տարիների ընթացքում խամրել են: Այսպես՝ հասկանալի է դառնում, որ Բարնսը ընդգծում է հիշողության սահմանափակումները՝ ներկայացնելով ժամանակային խառը հիշողության շերտեր, որտեղ իրականն ու երևակայականը դժվար է տարանջատել:

### Եզրակացություն

Վերլուծելով «Վերջի կանխազգացումը» ստեղծագործության ժամանակատարածային տարրերը՝ կարող ենք եզրահանգել.

1. Ժամանակը և տարածությունը երկում ունեն իրենց յուրահատուկ տեղը, որտեղ մեծ ու փոքր քրոնոտոպային բազմաթիվ միավորները ձևավորում են գեղարվեստական իրականությունը՝ պայմանավորելով ստեղծագործության իմաստը և գաղափարը:
2. Քրոնոտոպը «փոխակերպում» է երևակայականը՝ իրականի, իսկ իրականը՝ որպես երևակայականի:
3. Քրոնոտոպային բարդ զուգորդումներով հեղինակը խառնում է իրադարձությունների բովանդակությունը՝ հիշողության ողջ մակարդակը ներկայացնելով իբրև իրականություն:

**THE CONCEPT OF MEMORY IN JULIAN BARNES' NOVEL  
*THE SENSE OF AN ENDING***

**AREVHAT KHACHATRYAN**

*An Applicant  
Yerevan Brusov State University*

**Abstract**

The article examines the concept of memory in Julian Barnes' novel *The Sense of an Ending*, where the chronotope is a creative tool unifying the main idea of the novel. Chronotopic units are formed at the unique intersection of time and space, creating inimitable artistic reality. The chronotope is presented as a “transformation” modifying the imaginary and the real. The author mixes reality and memory, complicates the content of events, and creates a new world where the past and present merge, forming a multi-layered reality. This convergence challenges the reliability of personal memory and redefines narrative truth, illustrating how subjective recollection shapes identity and perception. The chronotope thus serves not merely as a structural device but as a lens through which the narrative interrogates the nature of memory, guilt, and the passage of time.

**Keywords:** Barnes, postmodernism, time, space, chronotope, imaginary, real, memory, repetition, transformation

## КОНЦЕПЦИЯ ПАМЯТИ В РОМАНЕ ДЖУЛИАНА БАРНСА «ПРЕДЧУВСТВИЕ КОНЦА»

**АРЕВАТ ХАЧАТРЯН**

*соискатель*

*Ереванский государственный  
университет имени В. Я. Брюсова*

### Аннотация

В статье рассматривается концепция памяти в романе Джулиана Барнса «Предчувствие конца», где хронотоп является творческим инструментом и объединяет основную идею романа. Хронотопические единицы формируются на уникальном пересечении времени и пространства, создавая неповторимую художественную реальность. Хронотоп представлен как «трансформация», изменяющая воображаемое и реальное. Автор смешивает реальность и память, усложняет содержание событий и создает новый мир, в котором прошлое и настоящее сливаются, создавая многослойную реальность. Это сближение ставит под вопрос достоверность индивидуальной памяти и переосмысливает повествовательную истину, демонстрируя то, как личные воспоминания формируют идентичность. Здесь хронотоп не только структурный прием, но и средство, позволяющее раскрыть темы памяти, вины и времени в повествовании.

**Ключевые слова:** Барнс, постмодернизм, время, пространство, хронотоп, воображаемое, реальное, память, повторение, трансформация

### Գրականության ցանկ

1. **Barnes J.**, *The Sense of an Ending*, U.K: Jonathan Cape, 2011.
2. **Bergson H.**, *Time and Free Will. An Essay on the Immediate Data of Consciousness*, London: George Allen & Unwin LTD, 2018, p. 98-134 (E-Book #56852, accessed 06.04.2024).
3. **Deleuze G.**, *The logic of sense*, London: Columbia University Press, 1990.
4. Interview with Barnes <https://www.pbs.org/newshour/arts/conversation-julian-barnes-winner-of-the-2011-man-booker-prize> (accessed 06.27.2024)
5. **Бахтин М.**, Формы времени и хронотоп в романе. Очерки по исторической поэтике, *Вопросы литературы и эстетики*, Москва: «Художественная литература», 1975.
6. *Лейбниц и его трактовка времени*  
[http://www.chronos.msu.ru/old/biographies/kazaryan\\_leibniz.html](http://www.chronos.msu.ru/old/biographies/kazaryan_leibniz.html)  
(accessed 07.07.2024)
7. **Хализев В. Е.**, *Теория литературы*, Москва: «Высшая школа», 2005.
8. **Женетт Ж.**, *Работы по поэтике. Фигуры*, в 2-х т., т. 1, Москва: Изд. им. Сабашниковых, 1998.

Ընդունվել է՝ 25.04.2025

Գրախոսվել է՝ 02.05.2025

Հանձնվել է քաղ.՝ 11.09.2025